

# ՅԱՐԳԱՆՔ՝ «ՄԱՆԿՈՒԹԻՒՆ ՉՈՒՆԵՑՈՂ .....» ԲԱՐԵՐԱՐՆԵՐՈՒՄ

Posted on August 7, 2018 by Keghart



Category: [Opinions](#)



## Տիգրան Արախամեան, Գանատա, 5 Օգոստոս 2018

Անտարակոյս սփիւռքահայ երեց սերունդի բարեգործ ներդրումը մեր ազգային կեանքի բազմապիսի բնագաւառներուն մէջ անզուգական երեւոյթ է, երբ նկատի առնենք, որ ջախջախիչ մեծամասնութիւնը այդ սերունդի ներկայացուցիչներուն «Մանկութիւն Չունեցող Մարդիկ» էին: Մեծապէս իրեց անշահախնդիր հայանուէր վերաբերումին կը պարտինք մեր ազգային կառոյցներու նիւթական ապահովութեան առաքելութիւնը: Յարգանք՝ բոլորին անխտիր անկախ անոնց դաւանական կամ քաղաքական հաւատամքէն:



Արդ՝ ներկայ գործարար սերունդը պիտի յաջողի՞ ինքզինք արժեւորել՝ ցուցաբերելով նախկինին պատրաստակամութիւնն ու նուիրաբերումը: Արմէն Յարութիւնեանը մէկն էր այդ բարերարներէն: Ստորագրեալս անմիջական կապ չեմ ունեցած իր հետ, սակայն համացանցային մամուլի շնորհիւ տեղեկացած եմ իր վաստակին մասին: Երբ [Keghart.com](http://Keghart.com) գործունեայ էր որպէս գաղափարներու փոխանակման պարբերաթերթ, ան [հարցազրոյցով մը հարստացուց կայքէջը](#): Յատկանշական են իր այս խօսքերը. «Գործունեութիւնս բաւական համեստ բան մըն է եւ ինչ որ ըրած եմ, համոզմամբ եղած է, բարի նախանձ արթնցնելու ուրիշներու մօտ եւ քաջալերելու որ նեցուկ կանգնին հայ գիր ու գրականութեան ջահակիրներուն: Սակայն նշմարած եմ որ այն տեղի չ'ունենար դժբախտաբար: Օրինակ, երբ հիմնեցի հայերէնի եւ հայոց պատմութեան ուսուցիչներու հիմնադրամը՝ Հ.Բ.Ը.Միութեան կառոյցէն ներս, ակնկալեցի որ մեր միւս ժողովական ընկերները նոյնպէս այսպիսի դրական քայլեր առնեն: Սակայն չեղաւ ու երեւի թէ այս մեր Ազգին առաւելութիւններէն է...:»

## Տիգրան Արախամեան, Գանատա, 5 Օգոստոս 2018

Անտարակոյս սփիւռքահայ երեց սերունդի բարեգործ ներդրումը մեր ազգային կեանքի բազմապիսի բնագաւառներուն մէջ անզուգական երեւոյթ է, երբ նկատի առնենք, որ ջախջախիչ մեծամասնութիւնը այդ սերունդի ներկայացուցիչներուն «Մանկութիւն Չունեցող Մարդիկ» էին: Մեծապէս իրեց անշահախնդիր հայանուէր վերաբերումին կը պարտինք մեր ազգային կառոյցներու նիւթական ապահովութեան առաքելութիւնը: Յարգանք՝ բոլորին անխտիր անկախ անոնց դաւանական կամ քաղաքական հաւատամքէն:



Արդ՝ ներկայ գործարար սերունդը պիտի յաջողի՞ ինքզինք արժեւորել՝ ցուցաբերելով նախկինին պատրաստակամութիւնն ու նուիրաբերումը: Արմէն Յարութիւնեանը մէկն էր այդ բարերարներէն: Ստորագրեալս անմիջական կապ չեմ ունեցած իր հետ, սակայն համացանցային մամուլի շնորհիւ տեղեկացած եմ իր վաստակին մասին: Երբ

Keghart.com գործունեայ էր որպէս գաղափարներու փոխանակման պարբերաթերթ, ան [հարցազրոյցով մը հարստացուց կայքէջը](#): Յատկանշական են իր այս խօսքերը.  
«Գործունեութիւնս բաւական համեստ բան մըն է եւ ինչ որ ըրած եմ, համոզմամբ եղած է, բարի նախանձ արթնցնելու ուրիշներու մօտ եւ քաջալերելու որ նեցուկ կանգնին հայ գիր ու գրականութեան ջահակիրներուն: Սակայն նշմարած եմ որ այն տեղի չ'ունենար դժբախտաբար: Օրինակ, երբ հիմնեցի հայերէնի եւ հայոց պատմութեան ուսուցիչներու հիմնադրամը՝ Հ.Բ.Ը.Միութեան կառոյցէն ներս, ակնկալեցի որ մեր միւս ժողովական ընկերները նոյնպէս այսպիսի դրական քայլեր առնեն: Սակայն չեղաւ ու երեւի թէ այս մեր Ազգին առաւելութիւններէն է...:»

Յարութիւնեան աւարտեց իր առաքելութիւնն ու կեանքը բաց ճակատով ու պարծանքով:

Յարգելով իր յիշատակը, ստորեւ հրատարակուած է իր հարագատներէն՝ Հուրի Իսկահատեան Յարութիւնեանի «[Մահագրական](#)»ը, այնուհետեւ իր ծննդավայր Հալեպի Բերիոյ Հայոց թեմի ազգային առաջնորդարանի պաշտօնաթերթ «[Գանձասար](#)»ի խօսքը: Այն ընթերցողները, որոնք կը փափաքին համապարփակ տեղեկութիւն ունենալ բարերարի կեանքին ու գործունեութեան մասին, կրնան թղթատել համացանցը, ուր բազմաթիւ արձանագրութիւններ տեղադրուած են:

## ՄԱՀԱԳՐԱԿԱՆ



### Հօրեղբայր Արմէն Յարութիւնեանի Յիշատակին

Շաբաթ մը առաջ մահուան մակոյկը մեզմէ ֆիզիքապէս հեռացուց հօրեղբայր Արմէն Յարութիւնեանը, որ իր ետին թողուց պարապութիւն մը: Այս օրերուն շատեր կ'ըսեն թէ անփոխարինելի մարդ չկայ: Անոր ֆիզիքական մահով դադրեցան եղբայրասիրութիւնը, բարութիւնը, վեհանձնութիւնը, հոգեկան արժեքներու կարեւորութիւնն ու նուիրումը որոնցմով Արմէն Յարութիւնեան արժեւորեց իր ապրած կեանքը: Հայ Ազգին հոգեբով ու ցաւերով տառապեցաւ ան եւ հայրենիքին յաղթանակներով ու յաջողութիւններով հրճուեցաւ անոր լայն սիրտը: Ան սիրեց իր հայրենիքը, ազգն ու մարդիկը ճիշդ այնպէս ինչպէս՝ իր եղբայրներն ու քոյրերը: Արմէն Յարութիւնեան բնաւ զանազանութիւն չէր դներ նիւթականով հարուստ կամ աղքատին միջեւ: Անոր համար կարեւորը մա՛րդն էր: Բոլորն ալ Աստուծոյ ստեղծածներն են կ'ըսէր ան: Անոր ազնիւ նկարագիրն ու հայրենասիրական բարերար գործերը բնաւ չազդուեցան ապականացու ազահութենէ եւ նիւթական ոյժերէ: Ան իր հարստութիւնը բաշխեց հայ ազգին ու աւելի հարստացաւ հոգիով եւ մարդկային արժեքներով:

Այո՛, ահա այս պատճառներով ան կը մնայ անփոխարինելի:

Յիսունէ աւելի հայերէն գիրքերու հրատարակութեամբ ան ապրեցաւ հեղինակներուն

հետ: Ինքն ալ դարձաւ լաւ հեղինակ ու գրող մը: Ան իր «նամակ»ներով փաստեց որ ըսելիք մը ունի: Ըսաւ ու անցաւ վիթխարի մարդու մը նման: Այսօր երբ ան չկայ մեր մէջ, կը մնան անոր գործերը՝ յաւերժ: Կը մնայ անոր անթառամ յիշատակն ու ազնիւ հոգին:

Խորին ցաւակցութիւններս՝ Տիկ. Սալբիին (Միմի), Մայտային, Ռաֆֆիին, Մուրատին ու համայն մեր գերդաստանին եւ անշո՛ղշտ հայ ազգին:

Աստուածաշունչը Յայտնութիւն Յովհաննու ԺԴ 13-ի մէջ կ'ըսէ.

«Երանելի են այն մեռելները, որոնք Տերոջմով կը ննջեն»:

Քեզ երբե՛ք չենք մոռնար, բարի ու իմաստուն հօրեղբայր:

### **Հուրի Իսկահատեան Յարութիւնեան**

Նիւ Ճըրսի, ԱՄՆ



### **ՀԱՆԳՈՒՑԵԱԼ ԲԱՐԵՐԱՐ ԱՐՄԷՆ ՅԱՐՈՒԹԻՒՆԵԱՆԻ ՅԻՇԱՏԱԿԻՆ**

Գանձասար, 3 Օգոստոս 2018

Չորեքշաբթի, 25 Յուլիս 2018-ին, Լիբանանի մէջ իր մահկանացուն կնքեց մտաւորական եւ բարերար Արմէն Յարութիւնեան: Կրթասիրաց Մշակութային Միութիւնը, Կրթասիրաց Ս. Չեմպերճեան Երկրդ. վարժարանի Հոգաբարձութիւնն ու Տնօրէնութիւնը եւ Կրթասիրաց Յարութիւնեան մանկապարտեզի Տնօրէնութիւնն ու ողջ անձնակազմը յարգելով իր յիշատակը՝ Կիրակի, 29 Յուլիս 2018-ին Ս. Աստուածածին եկեղեցւոյ մէջ, յետ Սուրբ եւ Անմահ Պատարագին, հոգեհանգստեան արարողութիւն կատարեցին, հանգուցեալ տիար Արմէնի հոգիին, որմէ ետք Կրթասիրացի մեծ ընտանիքը համախմբուեցաւ Կրթասիրաց Մշակութային Միութեան «Փիւնիկ» սրահէն ներս՝ յարգանքի տուրք մատուցելու Կրթասիրացի հարազատ զաւակ եւ բարերար Արմէն Յարութիւնեանի յիշատակին:

Կրթասիրաց Յարութիւնեան մանկապարտեզին կողմէ սրտի խօսք արտասանեց մանկապարտիզականուհի Մարգարիտ Շամիլեան՝ դիտել տալով որ 1974-էն սկսեալ մանկապարտեզը անուանուեցաւ Կրթասիրաց Յարութիւնեան մանկապարտեզ, առ ի յարգանք Յարութիւնեան ընտանիքի բարերարութեան: Ան իր ցաւակցութիւնները յայտնեց հանգուցեալին հարազատներուն եւ բարեկամներուն, ինչպէս նաեւ ուսուցչական կազմին երախտագիտութիւնը՝ մեծ բարերարի նկատմամբ:

Կրթասիրաց Մշկթ. Միութեան խօսքը արտասանեց Կրթասիրաց Մշկթ. Միութեան Խնամակալութեան ատենադպիր եւ Կրթասիրաց Ս. Չեմպերճեան Երկրդ. վարժարանի Հոգաբարձութեան ատենապետ բժիշկ Ռաֆֆի Չեյրճեան: Ան ներկայացուց Արմէն Յարութիւնեանի կենսագրականը եւ անցած բեղումնաւոր ուղին՝ յայտնելով, որ Արմէն

Յարութիւնեան ծնած է Հալէպ, 1930-ին: Յաճախած է Կրթասիրաց վարժարան եւ Ալէքիփօ գոլէճ: 1961-էն հաստատուած է Պէյրութ: Երկար տարիներ ծառայած է հայ եկեղեցւոյ, որպէս սարկաւազ: Ունեցած է բեղումնաւոր միութենական գործունեութիւն ՀԲԸՄ-ի եւ Այնթապի Հայրենակցական Միութեան մէջ: Իր նիւթաբարոյական աջակցութեամբ եւ յօդուածներով ծաղկեցուցած է «Նոր Այնթապ» պարբերաթերթը: Մինչեւ օրս, Կրթասիրաց Ս. Չեմպերճեան Երկրդ. վարժարանի երկրորդականի աշակերտներուն յատուկ հայոց պատմութեան եւ շարադրութեան մրցանակներու մեկենասութիւնը իր անունով կը կատարուի:

Հայ գիրի ու դպրոցի ջատագովը հանդիսանալով, մեկենասը եղած է 60-է աւելի գիրքերու հրատարակութեան եւ հեղինակը լիբանանահայ մամուլին մէջ «Նամակներ» խորագիրով յօդուածաշարքին: Վազգէն Ա. Կաթողիկոս 1991-ին գինք պատուած է Ս. Գրիգոր Լուսաւորիչի շքանշանով: 2017-ին Հայաստանի պետութեան կողմէ արժանացած է «Սովսէս Խորենացի» շքանշանին:

Ներկայացուած խօսքերուն ընդմէջէն հնչեցին Ներսէս Շնորհալիի «Նոր Ծաղիկ» շարականը՝ կատարողութեամբ Նայիրի Պարսումեանի, դաշնամուրի ընկերակցութեամբ Գայիանէ Սիմոնեան-Տերեանի: Կոմիտասի «Ծիրանի Ծառ» ստեղծագործութիւնը ներկայացուեցաւ Խաչիկ Աշճեանի կատարողութեամբ, դաշնամուրի ընկերակցութեամբ Յովիկ Օհանեանի:

Բարերարի Հալէպի մէջ գտնուող հարազատ եղբօր դուստր՝ Սիրան Յարութիւնեան անդրադարձաւ Յարութիւնեան ընտանիքի պատմութեան եւ շնորհակալութիւն յայտնեց Կրթասիրաց Մշկթ. Միութեան այս յիշարժան նախաձեռնութեան համար:

Արժանապատիւ Տ. Տաթեւ Ա. Քհնյ. Միքայէլեան իր սրտի խօսքին մէջ Սրբազան Հօր ցաւակցութիւն յայտնեց Յարութիւնեան ընտանիքին: Ան յիշեց բոլոր բարերարները՝ դիտել տալով, որ Յարութիւնեան ընտանիքը եւս գիտակցելով հայ սերունդներու հայեցի դաստիարակութեան անհրաժեշտութեան, իր նիւթաբարոյական աջակցութեամբ նեցուկ կանգնեցաւ Ս. Աստուածածին եկեղեցւոյ եւ Կրթասիրաց վարժարանի կառուցման աշխատանքներուն: Տէր Տաթեւ բարձրօրէն գնահատեց Կրթասիրաց Մշկթ. Միութեան այս նախաձեռնութիւնը՝ յայտնելով Արմէն Յարութիւնեանի ընտանիքին եւ բժշկուհի Անժէլ Յարութիւնեան-Չեմպերճեանին այս առիթով կատարած սրտաբուխ նուիրատուութիւնը թէ՛ եկեղեցւոյ, եւ թէ՛ դպրոցին:

Ներկաները միմեանց հրաժեշտ տուին հաւաքական աղօթքով առ Աստուած:

**Թղթակից**

